

মহুরোর মা অথবা রাজধানীর গল্প

মহুরোর মা লাঠি ঠুকে ঠুকে এসে আমাদের বারান্দায় বসে পড়ে হাঁপাতে হাঁপাতে বলল, কলকোতা থেকে নাতি আসবে বলেছিল, এলোনি, ইদিকে সাঁঝ নাগতে নেগেছে, ভাবলুম পাখি কটা তবে খোকাকেই দে'আসি। দাও বাবা, চার আনা পয়সা দাও।

বলে চারটে তিতির পাখি আমার সামনে নামিয়ে রেখে মহুরোর মা হাত পাতল। পাখিগুলির একটার সঙ্গে আরেকটার পা সুতলি দিয়ে বাঁধা, সেই অবস্থায় তারা ডানা ফরফর করে মাঝে মাঝে ওড়ার চেষ্টা করছে, হাঁপিয়ে গিয়ে দম নেবার চেষ্টায় তাদের ছোট্ট পেট ফুলে ফুলে উঠছে।

আমি বেশ মুশকিলে পড়লাম। একে তো, মহুরোর মা জানে না, বেশ কিছুদিন হল আমি আমিষ ছেড়ে দিয়েছি। তার ওপর যদিবা তিতিরগুলো কিনে নিয়ে পরে উড়িয়েও দিই, তার দাম মাত্র চার আনা?

জোর করে বেশি দাম দিতে গেলে সে কিছুতেই নেবে না। বোঝাতে গেলে বা বেশি জোর করলে সে এই বলে কাঁদতে বসবে— খোকাও আমায় ভিখিরি ভাবলি বাবা! এ আমি আগেও অনেকবার দেখেছি। বছর কয়েক আগে, যে-বছর ইন্দিরা গান্ধি নিহত হলেন, দিল্লি একেবারে অসহ্য লাগাতে সপ্তাহ কয়েকের ছুটি নিয়ে গ্রামে এসেছি, মহুরোর মা দুটো নারকেল নিয়ে এসে এক টাকা চাইল। বাজারে দুটো নারকেলের দাম তখনই সাত-আট টাকার কম নয়, কিন্তু সেকথা বোঝায় কে! শেষ পর্যন্ত তাকে সাহস করে একটা দু টাকার নোট দিলাম। চোখে তো প্রায় দ্যাখেই না, একটাকা আর দু-টাকার নোটে নিশ্চয়ই তফাত করতে পারবে না। মহুরোর মা নোটটার ওপর ঝুঁকে পড়ে আঙুল দিয়ে প্রথমে তার ধারগুলো ও পরে জমি ও তারপরে দুটোই একসঙ্গে পরীক্ষা করতে করতে হাউমাউ করে কেঁদে উঠল— তুমিও আমায় ভিখিরি ভাবলে বাবা! তোর দরজায় আমি কি ভিখিরি এয়েছি, খোকা!

আমার দিক থেকে সাড়া না পেয়ে মহুরোর মা অর্ধৈর্ষ হয়ে বলল, দাও বাবা, চার আনা পয়সার জন্য আর বোস থাকতি পারি না। অ্যাটটা আস্তা, ঘরে ফিরতি আত হয়ে যাবে।

আমি একটু নিদর্য হয়ে বললুম, মাছ-মাংস আমি ছেড়ে দিয়েছি দাদিমা।

আমি যখন এই বাড়িতে হামাঙুড়ি দিই তখন থেকেই (পরে শুনেছি, তারও আগে থেকে) মহুরোর মা আমাদের বাড়িতে ডিম, দুধ, নারকেল এইসব দিয়ে যেত। কথা বলতে শিখে মহুরোর মাকে আমি দাদিমা বলে ডাকতাম। আমার মা কিংবা বাবাই শিখিয়েছিলেন।

— তুমি কি নিমাই সন্নিসি হবে নাকি? কচি বয়েস, মাংস না খেলি চলে? এখনও বে-শাদিও করলে নি!

একথায় আমার সতিই হাসি পেয়ে গেল। চাকরি করে মাথার চুল প্রায় সাদা হয়ে এসেছে, বছর পাঁচেক পরে রিটারার করব— কচিই বটে! বে-শাদির বয়েসই বটে!

আসলে মহুরোর মার সঙ্গে আজকাল আমার বিশেষ দেখা সাক্ষাৎ হয় না। থাকি দিল্লিতে, কালে-ভদ্রে ছুটি নিয়ে দু-চার দিন আসি, এবার একটু ঘন ঘন এলাম। তার কারণ, রিটারার করে শেষ অর্ধি হয়তো এখানে এসেই থিতু হব। ছোটবেলা থেকেই গাছপালা আর লেখাপড়ার শখ, ওই দুটো নিয়ে থাকার ইচ্ছে। সেইভাবে এই বাড়িটা কোনদিকে কতটা অদল-বদল করা যায়, কিছুদিন ধরে নানাভাবে ভাবছি।

— কই বাবা?

অগত্যা ঘর থেকে একটা সিকি এনে মহুরোর মার হাতে দিয়ে বললাম, তোমার কাজকর্ম কেমন চলছে, দাদিমা?

মহুরোর মা সিকিটা আঁচলে বাঁধতে বাঁধতে সামনের দিকে বৃথা খানিক চেয়ে থেকে বলল, দিন আর কাটে না বাবা। ওজ সূর্য্য উঠতিছে, ওজ সূর্য্য ডুবতিছে, কিন্তু মনি হয় ব্যানো সূর্য্য উঠতিছেও না, ডুবতিছেও না।

মহুরোর মার আসল নাম কী কেউ জানে না। আদর্শই তার কোনও নাম আছে বা ছিল কিনা, জানার দরকারই হয় না। এ বিষয়ে কেউ

কখনও কিছু ভাবেও না। পাড়ার কেউ মহুরোর মার উঠোনে দাঁড়িয়ে মহুরোরকেই জিজ্ঞেস করে, মহুরোর মা মাঠ থেকে ফিরেছে রে, মহুরো?

দাঁত খোঁটা মহুরোর আয়ৌবন অভ্যেস, দাঁত খুঁটে খুঁটে সেও জবাব দেবে, মহুরোর মা কি তোমার ব্যামন-তামন বংশের মেয়েছেলে নাকি গো, বেলা তিনটেতেও মাঠে-ঘাটে ঘুরে মরবে? কী, বিছের ওষুধ নিতে এয়েছো, না কাছিমের ডিম?

বা হয়তো বলে (বিশেষ করে সন্ধ্যাবেলা কেউ এসে ডাকলে), মহুরোর মা কি তোমার জন্য ডুমুরের মধু নিয়ে বসে ওয়েছে যে অ্যাগবারে হত্যে দিয়ে পড়লে?

শুধু মহুরোই না, মহুরোর মাও তার আব্বাকে লতায়-পাতায় মুর্শিদাবাদের নবাবের বংশধর বলে বিশ্বাস করে।

মহুরোর মা'র আব্বা ভাতের সন্ধানে মুর্শিদাবাদের পৈতৃক ভিটে আর পিতৃপুরুষের কবরের মায়া ত্যাগ করে ঘুরতে ঘুরতে বারুইপুরের এই পশ্চিম সীমানায় এসে যখন ডেরা বাঁধে তখন এখানকার এইসব গ্রামে ছিল বলতে শুধু বন-জঙ্গল। জঙ্গলের শেষে জলা। মহুরোর মা'র আব্বা জঙ্গল কেটে প্রথমে নিজের চাষ-বাস ও পরে ক্রমশ আরও পাঁচজনের চাষ-বাসের ব্যবস্থা করে। তার শাদিও হয় এই নতুন বসতি করা ঘরের মেয়ের সঙ্গে। মাটিও নিল এখানেই। তারপর মহুরোর মা'র শাদি হল, সেও এই গাঁয়েরই ছেলের সঙ্গে। বছর চোদ্দ-পনেরো পরে সে-মানুষটাও মরে গেল। মহুরোর মা'র ছোট্ট মেয়ে তখন পেটে। সেই থেকে মহুরোর মা-ই সংসার চালায়। সেই মেয়ের শাদি হল য়েবারে, তখনও বারুইপুরে ইলেক্ট্রিক ট্রেন হয়নি। বছর কয়েক পর তার তালাকের সময় সবে ইলেক্ট্রিক ট্রেনের তার খাটানোর কাজ শুরু হয়েছে। তখনও এখানকার প্রবীণ হিন্দুরা বলাবলি করত, পশ্চিমের শুকনো খালটা আসলে আদিগঙ্গা। ভেলায় সাপে-কাটা লখিন্দরের শব নিয়ে বেউলা এখান দোই গেছিল।

ডুমুরের মধু মানে অবশ্য চোলাই মদ। মহুরোর মা নিজে চোলাই করে না, শুধু ছাপ্রাই দেয়।

তা সেই এক-দেড় কুড়ি বয়েস থেকে আজ এই চার কুড়ি পেরনো বয়স অর্ধি মহুরোর মাকে করতে হয়নি এমন কাজ পৃথিবীতে বোধহয় বেশি নেই। তাছাড়া উপায় কী, বাপ-মরা অতগুলো ছানাপোনা নিয়ে বিধবা হওয়া— উদয়-অস্তে তা ধরো গে তোমার এক কুড়ি পেট। মজার কথা, মহুরোও বুড়ো হত চলল, তবু আজও সে মাকে খাওয়ানো দূরের কথা, মা না হলে তাকেই আধপেটা খেয়ে থাকতে হত।

মহুরোর নিজের চার ছেলে সেয়ানা হয়ে কে কোথায় ছিটকে-ছিড়িয়ে গেছে মহুরো জানে না। ছোট ছেলেটাও মাঝে মাঝে চলে যায়। রাজমিস্ত্রির সঙ্গে যোগাড় দেয়, জনমজুর খাটে, মাটি কাটে। তখন চুলে খুব তেল দিয়ে টেরি বাগায়। তারপর চুলে ধুলো পড়লে বাড়ি ফিরে আসে। তখন রোজ রোজ শাক ভাতে কি গুগুলির ঝোলে বিরক্ত হয়ে কোনওদিন একমুঠো কাছিমের ডিম, কোনওদিন কয়েকটা পাখিটাখি খুঁজে আনে।

মহুরোর ছেলেরাই শুধু নয়, মহুরোর মার মেয়েদের ছেলেমেয়েরাও কে কোথায় আছে, কে কে বেঁচে আছে, কাদের শাদি হয়েছে, ছেলেমেয়ে হয়েছে— এসব হিসাবও মহুরোর মা'র ভারি গোলমাল হয়ে যায়। একটা সময় ছিল যখন আশপাশের দু-চার গাঁয়ের সিকিভাগ ছেলেমেয়েই মহুরোর মা'র নাতিপুতি। তারাও বেশিরভাগ অস্তত বছরে কোনও না কোনও সময় মহুরোর মা'র বাড়িতে এসে থেকে যেত। মহুরোর ছেলেরাও তখন বাড়িতেই থাকত। মহুরোর মা তখন লোকের বাড়ি-বাড়ি দুধ বেচত, ডিম বেচত, ছালা ভরা নারকেল বয়ে নিয়ে পৌঁছে দিয়ে আসত। তখনও যেটুকু জায়গা-জমি ছিল তাতে শশা ফলাত, বরবটি চিচিঙ্গা ফলাত। পালং মটর বুনত। কাজের তার শেষ ছিল না। তার কারণ মহুরোর মা'র সারা জীবনে একটাই কাজ— যেভাবে হোক সংসারের দুটো ভাত যোগাড় করা।

কার্তিক মাস শেষ হতে চলল, সন্দের মুখে এখনই ঠান্ডা পড়তে শুরু করেছে। মহুরোর মা এই বয়েসে, এই কুয়াশায়, বাপসা অন্ধকারে লাঠি ঠুকে ঠুকে চলে যাচ্ছে, কোমর থেকে শরীরটা ভেঙে রাস্তার হাত দুয়েক ওপরে প্রায় রাস্তার সমান্তরালে তার হেঁটে যাওয়া দেখতে দেখতে